

Date – 30/06/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma'n Remna Ni chuan hnamdang leh sakhaw dangte nena inremna thlen se a duh thu a sawi.**
- 2. Dr. K. Beichhua, MLA chu BJP Mizoram State President thar atan puan a ni.**
- 3. Chief Minister Pu Lalduhoma'n Mizoram sorkarin loneitute thar chhuah sawhthing a lei zawh sak ruala mipui rilru a siamtha chu lawmawm a tih thu a sawi.**
- 4. Telangana-a chemical factory pakhata reactor puakah mi 8 an thi.**

<><><>

PEACE DAY

Chief Minister Pu Lalduhoma'n Remna Ni hman chuan hnamdang leh sakhaw dangte nena inremna thlen se a duh thu a sawi.

Vawiina MZP buatsaih Remna Ni vawi 39-na Aizawl Lammual-a lawmnaah he thu hi sawiin Chief Minister Pu Lalduhoma chuan Sairang rel kawng chu hawn mai theihin an peih tawh a, Prime Minister hman hun an nghakani a ti a, Union Railway Minister Ashwini Vaishnaw nen pawh an inkawm tawh thu sawiin, Sairang Railway Station chu khawvel railway station dangte el pha, world class a siam turin a phal sak tih a sawi a. India rama rel chak ber chi Rajdhani service tir tura an dilna chu a phal sak bawk tih sawiin Sairang atangin Tripura, Sairang atangin Kolkata, Sairang atangin Delhi Rajdhani service a awm dawn a ti a. Hnamdang an lo luh zel dawn avangin ILP chungchangah te tih tur nasa tak an nei dawn a ti a. Tunlai thiamna a thlunkhawm vek anih tawh dawn avangin Mizote chu sakhaw dang bia te, tawng dang hmangte, hnamdang te nen chen ho thiam a ngai dawn tih a sawi a ni.

(Byte: Chief Minister Pu Lalduhoma)

Chief Minister chuan Akyab, tuna Sittwe an tih tak lawng chawlhmun pawh turin KMTTP kawngpui laih hma zawhfel tep a ni tawh tih sawiin he kawngpui hi a tlang chuan Mizoram mai ni lovin India ram insumdawna

kawngpui a ni dawn ani a ti a, Mizoram kawtchhuah chu chhim lamah a insawn tawh dawn tih sawiin, chu chuan nasa takin Mizoram a nghawng dawn a, chumi atana lo inbuatsaih dan tur rel turin Chief Secretary chu Study team a din tir a ni a ti.

Remna Ni lawmna inkhawmah hian Remna Ni puanzar pawt pharhin, 1st Bn. MAP Brass Band in "Ro min reksak ang che" tih hla mawi takin an rem a, Larsap Gen. Vijay Kumar Singh chuan Remna Ni pual hian Mizoram mipuite hnenah social media kaltlangin duhsakna a hlan a. Remna vawng nung zel tura chahin ram chhunga state ralmuang ber a lo ni ta chu ropui a tih thu a sawi a ni.

Remna Ni hi MNF party chuan Aizawl-a an party pisa Hnam Run-ah leh district khawpui hrang hrangah an lawm a, an party hruaitute'n an hmanpui a. Zoram Research Foundation (ZORF) leh NEICC Peace Centre, Shillong leh Aijal Club tang tlangin Remna chungchang zirhona Aijal Club-ah an buatsaih bawk.

Assam a district pakhata Mizoram a awm lai, Mizo district tih a nih lai March ni 1, 1966 khan Pu Laldenga kaihhruai MNF chuan India ram atanga inlakhran tumin ralthuam an lek tan a. Kum 20 zet Mizoram chu rambuui a a awm hnu in kum 1986 June ni 30 khan remna thuthlung ziah a ni ta ani. Sorkar laipui aiawhin khatih lai a union home secretary Pu RD Pradhan, rammu mek MNF aiawhin Pu Laldenga leh Mizoram sorkar aiawhin khatih laia chief secretary Pu Lalkhama te'n inremna thuthlung hi an zia a. Inremna thuthlunga Mizoram leh Mizote thuneihna sang zawk leh inhumhalhna bik ziah lan chu India Constitution article 371G-ah telh a ni.

Inremna thuthlung avang hian MNF rammute chuan an ralthuamte tungin Mizoram union territory chu kum 1987 February ni 20 khan state puitling a hlankai a ni a. Sorkar laipui-in hel pawlte inremna a siampui zawng zawnga hlawhtling bera ngaih chu Mizo Inremna hi a ni a, hemi hnu atang hian Mizoram chu ram puma state ralmuang ber a lo ni ta hial a ni.

<><><>

VAIRENGTE-SAIRANG HIGHWAY

PWD Minister Pu Vanlalhlana chuan vawiin khan a pisa-ah Vairengte leh Sairang inkar kawngpui siamthat leh enkawl chungchangah National Highways & Infrastructure Development Corporation Limited (NHIDCL) hotute leh Mizoram Tipper Association (MTA), Kolasib Sub-Headquarters aiawhte a kawm.

He inkawmhona hunah hian PWD Minister chuan Vairengte leh Sairang inkar kawng chu kum 2020 khan Ministry of Road Transport & Highways (MoRTH)-in NHIDCL kutah a hlan tawh tih sawiin, hetih hunlaia NHIDCL-in a lak theih loh chhan PWD hnathawh laklawh lai chu nikumah thawh zawh niin, NHIDCL kutah a awm tawh a ni, a ti a. National Highway chu MoRTH ta a nih thu sawiin, kawng siam leh enkawl zuina senso atana sum pawh MoRTH-in a tum thin a, a enkawl tur pawh a ruat thin a ni, a ti a. PWD Minister Pu Vanlalhlana chuan NHIDCL in hma an lak zui mai loh avangin Mizoram sawrkar chuan lirtheite an tlan hram hram theih nan ti-in helai kawng enkawl na'n hian nikum tangka kumah cheng nuai 200, kuminah cheng nuai 111, sing 7 leh sang 4 a seng tawh tih a tarlang bawk.

<><><>

MIZO BJP NEW PRESIDENT

Dr. K. Beichhua, MLA chu BJP Mizoram State President thar atan puan a ni.

Central BJP-in National RO for Mizoram atana a ruat, BJP National Mahila Morcha President Pi Vanathi Srinivasan chuan vawiin khan Atal Bhawan, Aizawlah BJP Mizoram State President thar atan Dr. K Beichhua chu chuhtu awm loa President atana thlan a nih thu a puang a. Pi Srinivisan chuan nimin Pathianni khan BJP Mizoram State President thar hi inlungruat taka thlan a nih thu sawiin, inthlan chuhtu awmchhun, Siaha Bialtu MLA nilai, Dr. K. Beichhua chu kum 2027 thleng President a ni ang a ti a, term hnih chung BJP Mizoram State President lo ni tawh Pu Vanlalhmuaka a thlak dawn a ni.

BJP Mizoram State President thar Dr. K Beichhua chuan an party chu a bulthut atanga tihchak a ngaih thu a sawi a. Unit tam zawk nei thei turin hma an la chho zel dawn tih a sawi a. Dr K Beichhua chuan Mizoramah BJP chu Kristian dotu party tih deuhthawa hriat a ni thin tih sawiin Mizo mipuite hnenah BJP chu Kristian dotu party ni lovin Prime Minister Narendra Modi-a'n ram tihmasawn, Viksit Bharat, Viksit Mizoram chu a thupui ber a ni tih zirtir a pawimawh hle tih a sawi a. BJP in hmasawna a ngaih pawimawhzia mipuite'n social media chak takah an hmuh thu sawiin mi tam takin an party an zawm belh zel a beisei thu leh, kum 2028-ah chuan Mizoramah sorkarna an siam ngei a beisei thu a sawi a ni.

(Byte: Dr. K. Beichhua)

BJP Mizoram State President kalchhuak Pu Vanlalhmuaka chuan amah thlaktu, President thar Dr. K. Beichhua chu a lawmpui thu a sawi a. Hmasawna chu khawpui nilovin thingtlang atangin a in tan a ti a, party-a an awm chuan hruaitu tura an President thlan chu mi eng ang pawh ni se, a chak chuan a rualin chak takin a hnung an zui ang a, a chak loh chuan amah tichak turin hna an thawk tur a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

GINGER PURCHASE

Chief Minister Pu Lalduhoma'n Mizoram sorkarin loneitute thar chhuah sawhthing a lei zawh sak ruala mipui rilru a siamtha chu lawmawm a tih thu a sawi a, mipui thilnungah a thlawna dawn tumna a awm tawh lova, rinawmna, taimakna, leh thawhrimna in an ngaihtuahna a hruai tawh a ni a ti.

Vawiina ZPM kaihhruai Mizoram Sorkar Bana Kaih - Thlai Thar Market hnuai kum 2024-25 sawhthing thar hun chung atana sawhthing lei kharna inkhawmah Chief Minister Pu Lalduhoma chuan he thu hi sawiin, Mizoramah hetiangah thlai thar lei hi a tum khatna a ni tih a sawi a. Sorkarin a

hralhna-ah a inrawlha rate tlahniam tur an ven sak loh chuan sumdawng inthurualte'n an lo tih fo thin angin a tirah a man sang deuh hlekin an leisak a, sawhthing market a tha ni a a lan avanga loneituten sawhthing an cho khawl teuh laiin a man an tihniam thut thin a, sawhthing an chawh khawl sa a tawih chhiat hma in, tlawm te te in an hralh a ngaih phah thin a, a ti a. Hetiang a thlen tawh loh na'n hian hma an la tih sawiin, Mizoram sorkarin sawhthing a leisak vawikhatna-ah a kum chhiat kum a thleng chuan ZPM policy thatzia pholangtu a ni a ti a, kuminah ZPM sorkar lo ta se, sawhthing hralh ngaihna hre lo tam tak an awm dawn a ti a. Mizoram sorkarin loneitute thar sawhthing a lei zawh sak ruala mipui rilru a siamtha chu lawmawm a tih thu a sawi a, sem policy a bova, mipui thinlungah a thlawna dawn tumna a awm tawh lova, rinawmna, taimakna, leh thawhrimna in an ngaihtuahna a hruai tawh a ni a ti. (Byte: CM Lalduhoma)

Agriculture Minister Pu PC Vanlalruata pawhin thu sawiin, loneituten an thawhrim rah an tel chu lawmawm a tih thu a sawi a, lo lam thil chu buaipui tham a awm loh chuan engmah a ni lo a ti a. Loneitute tana hlawkpui tham tur, awmze neia sum an lakluh theihna turin sawhthing an buaipui angin thlai dangte pawh kalphung mumal tak hnuai buaipui a ngai a, chutianga an tih loh chuan loneitute tan dinchhuah theih a ni lo a ti a. Hun lo awm zel turah pawh sorkarin market buaipui tham nei turin loneitute a zirtir ang a, hma an la zel dawn tih a sawi a ni.

(Corr: Maremi)

TELANGANA REACTOR BLAST

Telangana-ah vawiin khan Hyderabad bula chemical factory-ah reactor a puak a, he factory-a thawk mi 8 an thih bakah midang 28-in hliam an tuar baw. Reactor puah hnu lawkah kangmei nasa tak a chhuak zui a ni.

Prime Minister Narendra Modi-a chuan thi chhungte hnenah tawrhpuina hlanin Prime Minister's National Relief Fund atangin cheng nuai 2 theuha ral an nih tur thu a puang a, hliamte pawh cheng sing 5 theuh pek an ni ang, a ti baw.

<><><>